

ԳԱՀԱԿԱԼԱԿԱՆ ՊԱՅՔԱՐԸ ԳԱԳԻԿ Ի-Ի ՀԱՋՈՐԴՆԵՐԻ ՕՐՈՓ

Ռ. Ի. ՄԱԹԵՎՈՅՅԱՆ

Բագրատունյաց արքունիքը Գագիկ I-ի երեսնամյա կառավարման ընթացքում՝ 990—1020 թթ., հատուկ ուշադրություն դարձրեց պետության ամրապնդմանն ու կենտրոնացմանը: Նրան հաջողվեց ճնշել իշխանական անհնազանդության գրսեորումները և համախմբել հայ ազնվականությանը Շիրակի ֆեոդալական տան շուրջը¹: Հայաստանի հաբավում և հյուսիս-արևելքում գոյություն ունեցող Արծրունյաց և Սյունյաց թագավորությունները այդ շրջանում սերտ կապված էին Բագրատունի հայաց շահնշահի հետ, Գագիկի կին Կատրամիդեն Սյունյաց Վասակ թագավորի դուստրն էր², իսկ քույրը՝ Խուշուշը, Սենեքերիմ Արծրունու կինը³:

Կյանքի վերջում Դագիկն իրագործեց մի կարևոր միջոցառում, որը կոչված էր կարգավորելու ժառանգության հարցը և ապահովելու թագավորական իշխանության կայունությունը իր հաջորդի օրոք: Խնդրի հաջող լուծման համար նա հետևեց հոր օրինակին: Մի քանի տասնամյակ առաջ Դագիկի հայր Աշոտ Ողորմածը (953—977) իր իշխանության օրոք լուծեց երեք որդիների՝ Սմբատի, Գուրգենի և Գագիկի ժառանգության հարցը: Թագաժառանգ Սմբատին դարձրեց գահակից, իսկ մյուսների իշխանության բաժինը որոշեց յուրաքանչյուրի տիրույթների շրջանակներում:

Իրենից հետո ավագ որդին (Սմբատը) ժառանգելու էր գահը և շահնշահի իրավունքները, Գուրգենը մնալու էր թագավոր Տաշիր-Ջորոփորում⁴, իսկ Գագիկի բաժնեմասն էր Դեղարքունիքը և Շիրակի մի հատվածը:

Դրանով իսկ Աշոտը նախապես հաստատեց «արքունի տան գահերեցնե-րից» յուրաքանչյուրի տեղը պետական կառավարման սխեմայում և Բագրատունիների տոհմական ներքին աստիճանակարգում իր հետնորդի՝ Սմբատի թագավորության օրոք: Այդպիսի կարգը հնարավորություն տվեց խուսափել գահակալական անցանկալի վեճերից և բախումներից. Անանուն ժամանակագրի խոսքերով արքայորդիները «համակամ սիրով»⁵ լուծեցին գերագույն իշխանության հարցը և չվիճարկեցին Սմբատի թագավորական իրավունքը:

Մատենագիրների հաղորդումներից կարելի է եզրակացնել, որ նույն ձևով էր ձգտում կարգավորել գահաժառանգության հարցը նաև Գագիկը: Այդ մասին վարդան պատմագիրը վկայում է. «... մեռաւ Գագիկ, տուեալ զթագա-

1 Բ. Առաքելյան, Բագրատունյաց թագավորության հետագա զորեղացումը, տե՛ս «Հայ ժողովրդի պատմություն», հատ. 3, Երևան, 1976, էջ 133—139:

2. «Նովոփանսի Տարոնեցոյ Ասողկան Պատմութիւն տիեզերական», ՍՊԲ, 1887, էջ 256:

3 Ն. Սարգսյան, Տեղագրութիւնք ի Փոքր և ի Մեծ Հայս, Վենետիկ, 1864, էջ 257:

Գ. Սրվանձատյանց, Հնոց և նորոց, Կ. Պոլիս, 1874, էջ 14:

4 Ի. Մաթևոսյան, Գահակցության ինստիտուտը Աշոտ Գ-ի օրոք, ՀՍՍՀ ԳԱ «Լրաբեր» (հաս. գիտ.), 1977, № 1, էջ 76—78:

5 «Սմբար ժամանակագրություններ XIII—XVIII դարերի», կազմեց Վ. Ա. Հակոբյան, հատ. II, Երևան, 1956, էջ 501:

տրութիւնն երից որդւոց իւրոց, Յովհաննիսի, Աբասայ և Աշոտայ: Զթագն տայ Յովհաննիսի, և զԱնի, և զՇիրակ, զսուրբ Գրիգոր Զորովն՝ Աշոցաց, զԱնբերդ և զղաշտն Այրարատեան, զԿայեան և զԿայծոն և զՏաւուշ դաւառն Սեւորդեաց. և այլ մնացեալսն՝ Աշոտի և Աբասայ բաժանէ... և նստի (Աշոտը—Ռ. Մ.) թագաւոր Դրուց աշխարհին. և Աբաս ի Կարս»⁶:

Պատմիչի խոսքերը չպետք է հասկանալ այն իմաստով, թե Գաղիկը Հայոց թագավորութիւնը բաժանում էր երեք որդիների միջև. այն գահակալը, որը 30 տարիների ընթացքում պայքարել էր պետութեան կենտրոնացման համար, մի հարվածով չէր կործանի ձեռք բերած արդյունքը: Պատմիչը, մեր կարծիքով, մատնանշում է, որ շահնշահը կյանքի վերջում զբաղվել է իր հետնորդների ժառանգութեան հարցով և նախապես որոշել յուրաքանչյուրին հասանելիք տիրույթն ու նրանով պայմանավորված քաղաքական իշխանութիւնը պետութեան ներսում, որին նրանք տեղ կ'առնային ապագայում՝ իր մասից հետո:

Որդիներից յուրաքանչյուրի իշխանութիւնը տարածվելու էր որոշակի մարզերում: Դրանք այն մարզերն էին, որոնք դեռ Գաղիկի օրոք նրա որդիների իրավասութեան տակ էին՝ անձնական տիրույթներ և գավառներ, որտեղ շահնշահի որդիները, որպես արքունիքի ներկայացուցիչներ, կարող էին ունենալ վարչական իշխանութիւն: Ըստ այնմ Գաղիկը նախապես որոշում էր, թե իրենից հետո որդիներից յուրաքանչյուրը պետութեան որ երկրամասում է իշխելու և ինչ իրավասութեամբ. ավագ որդի Ղովհաննես-Սմբատը ճանաչվեց թագաժառանգ, նրա իրավասութեան տակ էին Վարդան պատմիչի նշանակած գավառները: Զոր մահից հետո նա էր գլխավորելու Հայոց թագավորութիւնը, նստավայր ունենալով Անի մայրաքաղաքը: Մյուս եղբոր՝ Աշոտի հողաբաժինը պատմիչները անվանում են «Դրուց աշխարհ»⁷, իսկ Արիստակես Լաստիվերտցին լրացնում է, որ Աշոտի բաժինն էր «զնեւքին կողմն աշխարհին»՝ որ հայի ի վերայ Պարսից և Վրաց»⁸: Այդ գավառները, որոնք սահմանակից էին Պարսկաստանին և Վրաստանին, ըստ վերը բացատրածի, Աշոտի կառավարչութեան տակ էին դեռ հոր իշխանութեան օրոք:

«Դրուց աշխարհի» մի մասում Աշոտը պետք է իշխեր որպես «տեւ» (իշխան, սենյոր) և ենթարկվեր ավագ եղբորը որպես Հայոց թագավորի և գերագույն սյուզերենի: Այսպիսով, Գաղիկը Աշոտ Ողորմածի նման նախապես որոշել էր որդիներից յուրաքանչյուրի դիրքը պետութեան ներսում իրեն հաջորդող թագավորի օրոք, դրանով նա հետամուտ էր լինում կանխելու հնարավոր գահակալական պայքարը ժառանգների միջև:

Բայց այս անգամ իշխանութեան հարցը «համակամ սիրով» չլուծվեց: Ուստի հիմա և մյուս պատմիչները հաղորդում են, որ Ղովհաննեսի և Աշոտի միջև առաջ եկավ «հակառակութիւն»: Աշոտը, օգնական զորք ստանալով՝ Վասպուրականի թագավոր Սենեքերիմից, պաշարեց և «նեղեց Անի քաղաքը»⁹: Եղբայրներին հաշտեցնելու համար միջամտեցին Բագրատունի և Պահլավունի իշխաններն ու Պետրոս կոթողիկոսը: Նրանց միջնորդութեան շնորհիվ վիճող

⁶ «Հավաքումն պատմութեան Վարդանայ վարդապետի», Վենետիկ, 1862, էջ 92:

⁷ Վարդան, էջ 92: Մատթեոս Ուսնայեցի, Ժամանակագրութիւն, Վաղարշապատ, 1890, էջ 10: «Սմբատայ սպարապետի Տարեգիրք», Վենետիկ, 1956, էջ 6:

⁸ «Արիստակեսի Լաստիվերտցոյ Պատմութիւն», Երևան, 1963, էջ 27:

⁹ Մատթեոս Ուսնայեցի, էջ 7—8: Սմբատ, էջ 5: Արիստակես Լաստիվերտցի, էջ 26—27:

կողմերը համաձայնության եկան պայմանով, որ Հովհաննես-Սմբատին մնա Անին շրջակա գավառներով (հիմնականում Շիրակը), իսկ Աշոտը ճանաչվեց «թագավոր Դրուց աշխարհի», բացի այդ, եղբոր մահից հետո նա կստանար Հովհաննեսի բաժինը և Անի քաղաքը. «Եւ յայնժամ սուրբ հայրապետն Պետրոս և իշխանքն ամենայն ելին առ Աշոտ և մեծաւ երդմամբ նստուցին զԱշոտ դրուց աշխարհին՝ թագաւոր ամենայն տանն Հայոց, և Հովհաննէս նստցի թագաւոր ի քաղաքն յԱնի. և եթէ մեռցի Յովհաննէս, Աշոտ լիցի թագաւոր ամենայն տանն Հայոց: Եւ յայնժամ եղև խաղաղութիւն ամենայն աշխարհին Հայոց»¹⁰:

Հայոց թագավոր Հովհաննես-Սմբատի և նրա եղբոր միջև կայացած համաձայնությունը և վերջինիս թագավորական իրավունքների ճանաչումը Հայաստանի որոշ մարզերի վրա հայ պատմագիտության մեջ դիտվում է որպես Բագրատունյաց թագավորության բաժանում Գագիկի որդիների միջև և նրա մասնատում երկու մասի¹¹: Նման բացատրությունը մեր կարծիքով վիճելի է և վերանայման կարիք ունի: Նախ, անհրաժեշտ է ուշադրություն դարձնել հետևյալ կախարհական գամանքի վրա: Կաթողիկոսը և իշխանները «երդումով» ճանաչել էին Աշոտի իրավունքները ոչ միայն «Դրուց աշխարհում», այլ նաև Անիի գահի վրա, որպես «թագավոր ամենայն տանն Հայոց»: Տվյալ դեպքում սկզբունքային նշանակություն չունի, որ այդ իրավունքը կապված էր որոշ վերապահումների հետ, նրա իրավասացումը լուրջ ժամանակի հարց էր, Աշոտը պետք է պարզապես համբերեր մինչև եղբոր մահը, որից հետո նա հաստատվելու էր Անիում, և նրա իշխանության տակ միավորվելու էին երկուսի բաժինները: Չնայած Աշոտը այդպես էլ չտիրացավ Անիին իր վաղաժամ մահվան պատճառով¹², բայց դա ոչ մի նշանակություն չունի: Նրա դին նույնիսկ տեղափոխեցին Անի և թաղեցին «ի տապանատունն առաջին թագաւորացն Հայոց»¹³:

Նշված հանգամանքները հիմք են տալիս մեզ վերանայել ընդունված տեսակետը և այլ բացատրություն առաջարկել 1-ի հետևորդների գահակալական պայքարին: Մեր կարծիքով Հովհաննես—Աշոտ պայքարի գլխավոր նպատակը վերջինիս համար ոչ թե «Դրուց աշխարհի» թագավորական իշխանությունն էր, որտեղ նա մինչ այդ արդեն իշխում էր որպես «տեր» (սենյոր), այլ նրա իրավունքների ճանաչումն էր որպես հայոց թագավորի ժառանգի Բագրատունյաց թագի և «շահնշահի» տիտղոսի ժառանգության իրավունքը

¹⁰ Մատթեոս Ուռհայեցի, էջ 10: Նաև՝ Սմբատ, էջ 6: Արիստակես Լաստիվերտցի, էջ 27:

¹¹ Լեո, Հայոց պատմություն, հատ. 2, տե՛ս «Երկերի ժողովածու», հատ. 2, Երևան, 1967, էջ 648: Հ. Հարությունյան, Հայաստանը IX—XI դդ., Երևան, 1959, էջ 251—253: Ս. Պողոսյան, Հայ ժողովրդի պատմություն, հատ. 2, Երևան, 1965, էջ 59: Որոշ հեղինակներ բառացի չեն գրում թագավորության բաժանման մասին, այլ նշում են Աշոտ IV-ի թագավորությունը «Դրուց աշխարհում» (տե՛ս Մ. Չամչյան, Հայոց պատմություն, հատ. 2, Վենետիկ, 1785, էջ 838: Ն. Դուրյան, Աղգային պատմություն, Երուսաղեմ, 1934, էջ 370—371: Հ. Բարթիկյան, Բագրատունյաց թագավորության անաժամը, տե՛ս «Հայ ժողովրդի պատմություն», հատ. 3, էջ 144—145):

¹² Արիստակես Լաստիվերտցի, էջ 55: Մատթեոս Ուռհայեցի, էջ 79:

¹³ Մատթեոս Ուռհայեցի, էջ 79: Սմբատ, էջ 33:

Հովհաննեսի շառավիղից, որի ներկայացուցիչն էր վերջինիս Աշոտ (Երկաթ) անունով որդին¹⁴, անցնում էր Աշոտ IV-ին և նրա հետնորդներին:

Այդ իրավունքով 1042 թ., Հովհաննեսի մահից հետո թագավոր է զօրավում «ի վերայ ամենայն տանն Հայոց»¹⁵ Աշոտ IV-ի որդին՝ Գագիկ II-ը (1042—1045):

Այսպիսով, «Դրուց աշխարհում» Աշոտ IV-ի թագավորական իշխանության ճանաչումով Հայաստանում հաստատվեց երկիշխանություն, որը տևեց մինչև 1040 թ.՝ Աշոտի մահը: Բա նշանակում է, որ Հայոց թագավորությունը 1020—1040 թթ. ունեցել է երկու թագավոր, ֆեոդալական հիերարխիայի գլուխ կանգնած են եղել երկու գերագույն սյուզերեններ: Այդ մասին ուղղակի վկայում է Սմբատ սպարապետը (էջ 6)՝ Կարսի Աբաս և Տաշիր-Չորոփորի Գուրգեն (պետք է լինի Դավիթ Անհողին) թագավորները իշխում էին Աշոտի և Հովհաննեսի հրամանով և «կային ի հնազանդութեան երկուց թագաւորացն Յովհաննիսի և Աշոտոյ»:

Առաջնությունը, այնուամենայնիվ, տրվել է Հովհաննեսին, քանզի վերջինս իր ավագություն շնորհիվ ժառանգել էր հոր թագը, դրա հետ միասին շահնշահի տիտղոսը և ճանաչվել Բագրատունյաց ազգապետ¹⁶: Աշոտ IV-ը, դառնալով «Դրուց աշխարհի» թագավոր, նույնպես ճանաչվեց «թագաւոր ամենայն տանն Հայոց», բայց չկարողանալով տիրել Անիին, չստացավ շահնշահի պատիվը: Բացառված չէ, որ նրա այցը Բաղդադ, խալիֆի մոտ¹⁷, հետապնդում էր հենց այդ նպատակը՝ ճանաչվել շահնշահ և խլել առաջնությունը եղբորից:

Անիի շուրջը ծավալված պայքարը ցույց է տալիս, թե որքան էր մեծացել Աշոտ Ողորմածի գահանիստ կենտրոնի դերը Հայաստանի քաղաքական կյանքում: Աշոտի հաջորդներից ոչ մեկը մայրաքաղաքը այլևս չտեղափոխեց իր սեփական տիրույթների ղգյակը, ինչպես այդ անում էին Հայոց թագավորները սկսած Աշոտ I-ից մինչև Աբասը ներառյալ (IX դարի վերջ—X դարի կեսեր)¹⁸:

Ուշագրավ է, որ Հովհաննես-Սմբատի դեմ պայքարող Աշոտ IV-ը նույնպես ամեն կերպ ձգտում էր տիրանալ Անիին: Նույնիսկ ճանաչվելով թագավոր, Աշոտը փորձեց խորամանկությամբ հասնել իր նպատակին: Նա հիվանդ ձեռքերից իրեն և հրավիրեց եղբորը Թալին (հավանաբար իր նստավայրը), որտեղ դերեվարեց և հանձնարարեց իր վասալ իշխաններից Ապիրատին սպանել Հովհաննեսին: Ապիրատը չկատարեց սյուզերենի հրամանը և ազատ յործակեց շահնշահին¹⁹:

Այնուհանդերձ Աշոտը մասնակիորեն հասավ իր նպատակին, ստիպելով հայ ազնվականությանը և կաթողիկոսին ճանաչել իրեն Անիի ժառանգորդ:

14 Տե՛ս Գ. Հովսեփյան, Հիշատակարանը ձեռագրաց. Անթիլիաս, 1951, էջ 121—122; Ղ. Ալիշան, Սիսական, Վենետիկ, 1853, էջ 518: Նույնի՝ Շիրակ, Վենետիկ, 1881, էջ 171: Արիստակես Լաստիվերտցի, էջ 32:

15 Մատթեոս Ուռհայեցի, էջ 86—87: Սմբատ, էջ 36—37: Արիստակես Լաստիվերտցի, էջ 58:

16 Մատթեոս Ուռհայեցի, էջ 44, 84: Ղ. Ալիշան, Շիրակ, էջ 20, 31, 53, 136, 171:

17 Մատթեոս Ուռհայեցի, էջ 8: Սմբատ, էջ 5:

18 Տե՛ս ՀՍՍՀ ԳԱ «Լրաբեր» (հաս. գիտ.), 1978, № 5, էջ 92—94:

19 «Միլիթարայ Անեցույ Պատմութիւն», ՍՊԲ, 1879, էջ 52: Վարդան, էջ 97:

Այս դեպքում ակնհայտորեն դրսևորված է Աշոտի ներքին քաղաքական գիծը՝ Բագրատունյաց գահին և «շահնշահի» տիրողոսին հասնելու համար ինչ գնով էլ լինի, նա պետք է գրավեր Անին։ Եթե նկատի ունենանք, որ IX—XI դդ. քաղաքները հանդիսանում էին առանձին ֆեոդալական իշխանությունների կենտրոններ²⁰, ապա շատ ուշագրավ է այն փաստը, որ Աշոտ III-ից հետո իշխող Հայոց թագավորների (Սմբատ II, Գագիկ I, և Հովհաննես-Սմբատ) նստավայրերը ոչ թե նրանց ֆեոդալական տիրույթների կենտրոններում էին, այլ Անիում։ Կարելի է վստահորեն ասել, որ Աշոտ III-ի թագավորության տարիներից Անին դարձել էր համահայկական զահանխատ կենտրոն-մայրաքաղաք։

Վերջում ցանկանում ենք մի քանի խոսքով անդրադառնալ Գագիկի հետնորդների դահակալական պայքարի զրգապատճառներին։ Աշոտի հավակնությունները միայն իշխանամոլությունամբ բացատրել չի կարելի։ Պատճառները շատ ավելի լուրջ էին և խորը։ Ցավոք, սկզբնաղբյուրները սեղմ են խոսում մեզ հետաքրքրող դեպքերի մասին. այնուամենայնիվ նրանց հակիրճ խոսքերում կա մի ակնարկ, որը հետևությունների առիթ է տալիս։ Լաստիվերտցին Գագիկի որդիների մասին գրում է. «Պայազատեն գիշխանությունն որդիք նորա Սմբատ՝ զոր Յովհաննէս կոչէին, և Աշոտ նորին հարազատ»²¹։

Պատմիչի այս խոսքը հիմք է տալիս ենթադրելու, որ Գագիկ շահնշահը, զգտնով կարգավորել թագավորական իշխանության ժառանգական կարգը և բաշխել որդիների միջև յուրաքանչյուրի ֆունկցիաներն իր հաջորդի օրոք, որոշակի իրավունքներ է վերապահել երկրորդ որդուն։ Վերջինս հոր օրոք անկասկած ազդեցիկ դիրք էր գրավում արքունիքում և բացառված չէ, որ մասնակից լիներ երկրի կառավարմանը, նրա վարչական իշխանության տակ թերևս գտնվեին այն մարզերը, որոնք թիչ ավելի ուշ կադմեցին «Դրույ աշխարհը»։

Իշխանության «պայազատումը» եղբայրների կողմից նշանակում է, որ Հովհաննեսի օրոք Աշոտը առաջվա պես մնում էր կառավարման մասնակից շահնշահ Հովհաննեսի դերագույն իշխանության ներքո։ Այս հզորացությունը հաստատվում է նաև զահաժառանգություն կարգի մասին Վարդանի վկայությամբ։ Սակայն Աշոտը դժգոհ մնաց իրեն հասած բաժնեմասից և փորձեց խել գահը եղբորից։ Նա հաշվի էր առնում Հովհաննեսի թուլությունը որպես պետության ղեկավարի, որն այն ժամանակվա պայմաններում պետք է լիներ քաջ զորավար, անձամբ առաջնորդեր բանակը (ինչպիսիք էին Բագրատունի բոլոր նախորդ թագավորները։ սկսած Աշոտ I-ից մինչև Գագիկ I-ը)։ Բայց Հովհաննեսը, ըստ պատմիչների շատ հեռու էր ռազմական գործից։ Նա «իմաստուն էր և հանճարեղ», բայց «մարմնով տարտամ և թուլամորթ պա-

²⁰ Բ. Առաչելյան, Քաղաքների դերն ու նշանակությունը երկրի հասարակական-տնտեսական կյանքում, «Հայ ժողովրդի պատմություն», հատ. 3, էջ 246։

²¹ Արխիսակես Լաստիվերտցի, էջ 26։ Ուոհայեցու մոտ հանդիպում ենք հետևյալ ուշագրավ վկայությանը. «Բոնակալեաց Յովհաննէս զաթոռ թագաւորութեանն Հայոց»։ Ե Աշոտ շրջէր գորօքն և աւար հարկանէր զբազում տեղիս և նեղէր զքաղաքն Անի» (տե՛ս Նատիւեոս Ուոհայեցի, էջ 8։ Սմբատ, էջ 5)։ Դուցե այս տողերում պատմիչը ակնարկում է, որ Հովհաննեսը ձգտել է իրեն ենթարկել նաև եղբոր իրավասության տակ գտնվող մարզերը և հրկել նրան իշխանությունից։

տերադմում», իսկ Աշոտը հակառակը՝ «արի էր և քաջասիրտ, հաղթող պատերազմներում»²²:

Երբ Աշոտը հարձակվեց Անիի վրա, Հովհաննեսը նույնիսկ շմասնակցեց սարտերին. այդ մասին Ուռհայեցին գրում է. «Նվ իբրև լուա Յովհաննէս զգալն Աշոտոյ եղբօրն իւրոյ, հրամայեաց փող պատերազմի հարկանել, և ինքն ի զահոյսն անշարժ նստեալ կայր, վասն զի անհմուտ էր պատերազմի»²³: Նշված կարևոր շափանիշով Աշոտը բացահայտորեն գերադանցում էր եղբորը և ձգտում էր հեռացնել թույլ գահակալին: Ըստ երևույթին նրա դիրքը արքունիքում և ֆեոդալական միջավայրում որոշակի նախադրյալներ էին ստեղծում իր ձգտումն իրագործելու համար: Աշոտի մեծ հեղինակությունը երկրում հաստատվում է ֆեոդալական ավագանու և կաթողիկոսի հանդուրժողական վերաբերմունքով՝ նրա հավակնությունների հանդեպ: Աշոտի կողմնակիցներն էին «Դրուց աշխարհի» իշխանները և որոշ խոշոր ֆեոդալներ, ինչպիսին էր, օրինակ, Սենեբերիմ Արծրունին, բայց ըստ երևույթին կողմերի ուժերը մոտավորապես հավասար էին և երկուսն էլ ընդունեցին ավագանու հաշտարար միջնորդությունը: Ավագանին աշխատեց հաշտեցնել եղբայրներին, իհարկե, հաշվի առնելով ստեղծված իրավիճակը, ուժերի ռեալ հարաբերակցությունը և այդ բանն արվեց շատ նրբանկատ ու հմտորեն:

Իհարկե, Աշոտը կգերադասեր զահին և շահնշահի պատվին տիրանալ անմիջապես, բայց զգաց, որ ներկա պահին չի կարող ավելին ձեռք բերել: Նրան խանգարեց ֆեոդալական ավագանու և ազատների հակադիր մասի դիմադրությունը: Խոշոր ավատատերերի թվում կային նաև Հովհաննեսի կողմնակիցները՝ նրա հետ վասալական հարաբերություններով կապված ֆեոդալներ: Նրանք չէին հանդուրժի իրենց սյուզերենի տապալումը, որովհետև այդ դեպքում կկորցնեին գիրքը արքունիքում, պաշտոնները և այլ արտոնություններ, ուստի պաշտպանեցին Հովհաննեսին և դրա հետևանքով առաջ եկավ «հակառակությունը»՝ ներֆեոդալական պայքարը, որին վերջ տվեց կաթողիկոսի և ավագանու չեղոք մասի միջնորդությունը, որին միացել էր Գեորգի I վիրա-աբխաղաց թագավորը: Հովհաննեսը, իր հերթին, ակամա ընդունեց հաշտության պայմանը, որովհետև այլ բան չէր կարող անել, դրա շնորհիվ նա գոնե ցկյանս պահպանեց զահը:

Գագիկի այս հրկու հետնորդներից, ինչպես վերը նշվեց, ավելի գերադասելի էր Աշոտը, որը պատմիչների վկայությամբ ավելի համապատասխանում էր ժամանակի պահանջներին, ավելի գործունյա էր, վճռական և քաջ ռազմիկ՝ պաշտպանեց իր «աշխարհը» հարևան մահմեդական ամիրաներից²⁴: Նա մեծ ազդեցություն ուներ երկրում. կաստիվերտցին ասում է, որ նա «զբրանայ քան զամենեան, որ յառաջ քան զնա էին. մինչ զի բազումք ի մեծամեծացն՝ զհայրենի տեղիս իւրեանց ի նա թողեալ, նմա զանձինս կամօք ի հնազանդութիւն ետուն»²⁵: Աշոտը կարողացավ ստիպել ֆեոդալական ավագանուն ընդառաջելու իր գահակալական հավակնություններին:

²² Ն'ատթևոս Ուռհայեցի, էջ 7, 8: Արիստակես Լաստիվերտցի, էջ 26, 27:

²³ Մատթևոս Ուռհայեցի, էջ 8:

²⁴ Արիստակես Լաստիվերտցի, էջ 27—28:

²⁵ Նույն տեղում, էջ 28:

МЕЖДОУСОБНАЯ БОРЬБА ПРИ ПРЕЕМНИКАХ ГАГИКА I

Р. И. МАТЕВОСЯН

(Резюме)

Гагику I Багратуни (990—1020) наследовал его старший сын Ованес-Смбат, однако брат последнего Ашот выступил с притязаниями на отцовский престол. Спор был улажен при посредничестве феодальной знати, и Ованес остался царем Армении с резиденцией в Ани, Ашот же был признан царем территории, называемой в источниках «Друц ашхар»-ом. Следствием признания прав Ашота, по нашему мнению, было не разделение Багратидского царства на две части, как принято считать в армянской историографии, а временное двоевластие, которое длилось до воцарения Гагика II, объединившего в 1042 г. владения обоих правителей.